

近代中國史料叢刊續編第九十八輯  
沈雲龍主編

# 金冬心先生詩集

金農著

文海出版社

有限公司

印行

金冬心先生詩集

冬

心

先

生

集

寒心先生四十五歲小像



寒心先生小像

廣陵高翔寫

堯之外臣漢逸  
民著簪笏年帶  
不諱貧疎髯  
高顙全天真半  
生舟楫蹄與輪  
詩名到處傳千  
春蒲州鐫仲益  
題

予賦性幽賈少耽索居味道之樂有田幾椽屋  
數區在錢塘江上中爲書堂面江背山江之外  
又山無窮若沃洲天姥雲門洛思諸峯嶺羣欲  
褰裳涉波暱就予者於是目厭煙霏耳飽瀾浪  
意若有得時取古人經籍文辭研披不聞昕夕  
會心而吟紙墨遂多然猶不自慊近交里閭二  
三能言之士大抵多與予同其好林壑間雋僧  
隱流盍單瓢笠之往還復饒苦硬清峭之思相  
與攄發抉擿盡取高車影纓輩所不至之境不  
道之語而琢之績之由是世遂比數予於詩人

予翻然秘匿懼其隘而不廣於見聞直而不愜  
於比興瘠而不腴於枝葉笑覆陸機之詆屢矣  
或有躋予於鉅公派別者予曰昔徐師川不深  
附西江張伯雨能超乎鐵雅詩固各有體趨今  
何如則古邪迺鄙意所好常在玉溪天隨之間  
玉溪賞其窈眇之音而清豔不乏天隨標其幽  
澁之旨而奧衍爲多然寧必規玉溪而範天隨  
哉予之詩不玉溪不天隨即玉溪即天隨耳比  
長年來益爲汗漫遊徧走齊魯燕趙秦晉楚粵  
之邦或名嶽大河傾寫胸臆或荒臺侈殿棖觸

古懷或雨零風歛感傷羈屑或箏人酒徒飛揚  
意氣境會所遷聲情隨赴不諧衆耳唯矜孤吹  
此則予詩之大凡也孤露以後舊業隨廢欲求  
天隨子松江通潮之田小雞山之樵薪已不可  
得旅食益益困念玉溪生有打鐘掃地爲清涼山  
行者誓願因示誓願五十之年便將衣械入林  
得句呈佛以送餘生遂發憤將舊藁刪削編香  
都爲四卷寫一淨本付之鏤木家自今有索冬  
心先生而望岫息心者得不披對此集乎冬心  
先生者予丙申病疴江上寒宵懷人不寐申旦



遂取崔國輔寂寥抱冬心之語以自號今以氏  
其集云雍正十一年十月錢塘金農自序

冬心先生集卷第一

錢塘金 農 壽門

予處田野與物無爭賦雜體一章頌稼事  
也遍爲告誡以當農謠

蠶桑月令過芒種天所予老巫卜瓦卦請驗苦  
諺語勤墾穰經興田家苦驕陽行禱不雨厄勸  
龍各一觴跼躄躄復跼躄躄阪筋力顫鞭箠爾雖  
長寧識牛性善西域比戶忙窄衣只掩髀鬲泥  
三尺渾朝來喧築壩王命布農事秋收戒其荒  
曖曖墟中煙五里聞炊香太歲值豐年出入皆

大吉督工邨夫子風俗耻貨殖

月夜叩瀟禪師講堂

去天只一握峯勢儼西華歛聞雲脚香蒼蒼滿  
牀下二十五條衣吾師諦妙義住于忍界中不  
唾琉璃地禪定靈鷲棲客心生幽怖破寺寒月  
來水光千萬樹僧回念夙緣今宵侍瓶鉢悄聽  
鄰鐘聲合掌亂山謁

雪中懷會稽陶十二幼雅

山雪白皚皚郊扉晝不開嬾爲洛陽卧誰共霸  
陵杯窺礪鳥聲合入林江影來遙思嚴長史清

嘯柰娥臺

寄吳丈允嘉

北郭依喬木青山屬隱君  
心知白雲妙書愛衆  
香熏草閣編遺集澎湖采舊聞  
猶誇健如犢課  
子事耕耘

楊知陳章見過冬心齋予出漢唐金石搨

本二百四十種共觀

空巷草根苦遭此秋雨屯離披一尺長那知中  
有人守窮如守盟向壁獨弔影書家得申韓二  
子欣造請聖唐與神漢文字古所敦吉金貞石

志辨證菟株源嗟嗟暝色催客去倚江渚炊煙  
飢不生寒雞各上距

碧瀾堂寄王豫

酒漉紗巾春甕開碧瀾堂外望滌河此閒絲竹  
聲淒喚善病王郎竟不來

雨後獨步池上

煙際曳筇人掩關繞行池上夜忘還萍萍剛得  
雨吹散吐出月痕如破環

盧圻港

瓜皮艇子水黏天認得盧圻港口煙一巾霜叢

有人語晚風撐到卧牀前

若溪曲二首

淨綠瓜瓢嫩採藍草汁熏光明河畔水好與染  
羅帶

下若翠物香細嘗淡爲貴但能通顏色何必沙  
糖味

題貞曜先生集後

苦詞峭刻寡情懽孟保荒迷石井闌一尉終身  
貧至此溪堂草木笑清寒

同鮑十四明府鈗高十一秀才岳過夾山

漾舟中阻風

先生解官印快遊心目開我已一笑諾况攜杜  
秀才單櫂入鏡行春波宛南浦煥翠浮嵐中活  
脫峯伍伍長林夾山漾修坂小康邨如何寂莫  
意展望傷客魂青冥變茫茫蒼織未從雲起只此  
十里閒愁風復愁水

雙林晚景

若練吳波折復迴遙岑悄沒夕陽催絕無人影  
檣聲過蘋葉中間一道開

曲江之上先人敝廬在焉積疴初勸雜書

六首

門庭就衰落彈指等浮漚  
羗非廣絕交客肯浪  
見投戀戀兩黃犬蕭蕭一蒼頭  
自拾甌中塵貧  
簞忘苟求麻薄葛鹿麕疎  
摧燒各悲秋

七八月之間胡爲抱積瘴  
酒庫麴蘖荒相思屢  
欠呵比無俗喧逐耳目成懶惰  
野花墻匡生暗  
泉牀下過嫋嫋涼葉飛  
虛堂枕手卧

鄉里時問疾幼女戲槌背  
合和藥一劑差覺醫  
可愛辛苦服三苓本草出袖內  
江湖計已輟攝  
生理固在誓將乞神農  
止樊永潛晦



舊種倔強松弱藤互勾棘上巢塌翅禽反哺形  
偪人馴性年復年奚忍施繳弋似憐主人意當  
午叫不息博得二千石餘糧爲汝食

憶昔載遊具賢尹真吾曹春帆十幅蒲太湖行  
週遭百里洲上樹疎瘦如牛毛題詩大雷山詭  
蹟搜冥竅至今寒夢中洵洵驚波濤

退院赴齋期緇流澹孤蹤禪派話靈嶽方袍策  
短筇功德離垢幢竦然聞清鐘秋光妙渲染溪  
雲洩陰濃變雨忽不雨乃朶朶簷際峯

比日嘗過  
梵天講寺

爲散疾  
之遊

前江後山書堂修竹十五竿爲人刪除作  
詩惜之

籊籊青竹竿環繞江上宅移自剡中僧歲之攝  
提格略除蟲蠹侵不計土肥瘠我無食肉相稍  
喜共蕭索微陽蔭檻隅涼吹通林隙娟秀若翠  
葆婆娑悅媚嬾今秋遊故鄣羈旅成俗客負此  
十五莖苦節抱孤直可憐遭劓去束縛竟拋擲  
寧爲籊與箕免受煎茶厄

四哀詩

而翁遠竄謫惡信來夢寐肉與骨相離袖有一

掬淚痛君投荒尋瘴癘犴獠地近復奔東都絕  
粒嵩陽寺七年賦零丁漫滅背上字蔡本馴

少壯藩邸遊晚歸嗇于遇粉本工小筆能箋爾

雅誤逢逢羅刹江忽聞王公訃哀哉篆墓甄銘

語賤子作叶丙舍繞沮如殘花剝如雨王璵

黑頭榮戟郎引我稱兄弟未解算錢刀恰諳食

苦齋昨歲結清懽水嬉共秋楔隔世悲音塵朋

黨失文藝齒冷同輩兒驕人只門第楊守晟

古樂栖神明撫琴卧巖藪絲中有木聲不生荆

棘手嘗言海虞老指法非矯揉練心日復旦天

乎奪長壽幽竈何時營撒絃瀝吾酒張澧

題鮑十四遊鄧尉探梅諸詩後二首

鮑清風是木腸兒銅井銅院踐素期塔影湖光  
樹中見花香偏在裹頭時

方丈燈明萬籟虛夙生慧業究何如開堂一語  
君叅否水底蓬塵山上魚

平望驛曉發過太湖

解纜畫眉橋川程浩瀾瀾乞得美滿風快如渡  
彭蠡聒天波空靈初陽樹迢遞回頭莫釐峰厭  
厭未梳洗

宿焦山

縹緲松寥山積翠下無路風籟鐘微茫鶴跡雲  
散聚如聞定中僧禪窟勸小住牽月濯巾鉸江  
光漾高樹

廣陵客舍寄荅謝大遵王

一月閉門恒自飢連朝養疴嬾賦詩高僧送米  
苦難得殘客索書佯不知昨宵小飲酒人處拍  
浮笑記鮦陽語三十六陂清露香秋暑已被花  
銷去中年以往萬事輸豈惜齒痛鬚半枯柔絲  
織管領風味早衰吾欲稱老夫

南郭

連坳重阪近幽栖  
菜甲抽青自灌畦  
剛得天涼三日雨  
秋光如水草蟲啼

題方氏池上壁

憑欄送遠目積陰  
生陂塘水木自明  
瑟鳥鷺鷥荷拍張  
棊從嶽僧覆茶共  
蜀客嘗纖雨晚飛  
來晞髮池上涼

楊三十五過宿廣陵客舍

秋林正涼雨爲洗  
客衣塵而我褊衡  
病夫君原憲貧歲  
看華鬢負改話到  
故山真今夜然鐙  
坐鄉

愁添一人

秋來

紈扇生衣捐已無  
搯中庭樹一日秋風一

汪墳陳章見注

一夜風葉中聽雨敲  
修修誰不惜游子  
根日以浮

他鄉樂亦苦淚滴  
兩陂怯渡黃連港  
篔簹

爾啟客顏

孫憲遺米予于僧厨作粥食之戲報此詩  
學佛疲津梁辟穀乃不可長飢東方生胡能達  
青瑣遺誚桑下留俄悲菰間墮瑾戶類蟄蟲繩  
牀擁絮坐榻榻聞叩聲于思劇憐我三升分倉  
儲精鑿出揚簞作糜感殷勤瓦鉢撥宿火一飽  
計已奢何須炙車輶

月夜陸立劉乃大見過

一卷細注陸德明千鴟不醉劉公榮譚經飲酒  
得二友時顧寂莫僧寮清奇葩芬口義可取糟



世寓言理非誦獨我天寒夜失眠低頭泱泱霜  
月苦

閔華治酒送別

雷陂重相送餞席暫淹留人作浮雲笑酒生明  
日愁西風孤燭夜涼笛五湖舟繚白縈青外家  
山話越州

松陵雨泊

依然襍被返句吳踪跡荒涼似野鳧一夕菰蒲  
打篷雨聲聲引夢入江湖

懷人絕句三十首

漢陰丈人甘遯跡筆札奇奧驅夔魑破費菖蒲  
洗煩惱三層樓上注蟲魚

數來武林作詞客市上獨傾酒百杯觀者圍場  
頓擣舌硬弓力挽癩如雷

杪櫺陰蔽菩薩泉壁挂鎖子空厨煙記得山中  
秋雨歇大家來看兜羅絲

宋元雕本積萬卷夫子著書游禁庭近不得意  
但高卧秋風吹老古槐廳

平生沈九巖十六雕句鍊格超籬樊昨賦宮體  
更新變對君端欲把降旂

玉練槌香天氣晴秋來曾訪長官清蘋花百里  
快煙水柔橈一枝搖進城

流浪定悲朱邱改幽潛已遼鶴書徵年年送客  
徒爲郡支俸何人刻七經

詩文酷似梅歐陽七十授官君敢強不畏早朝  
待宮漏尺三汗脚滿鞞霜

季子豈長貧賤者逸經熟闕祕且奇縛帚莽中  
每來往尖頭僧請覆殘棊

嚼徵含商譜曲遲語兒溪畔憶爰絲渚禽喧聒  
無來客雨散秋堂長澤葵

解印真成衰謝翁會稽仙令等飄蓬左車作惡  
何人問只合抽身藥院中

今年專仿甘風子論畫老兄時見招漸漸斜陽  
平水閣簷花顛倒散魚苗

疎放偏能墜酒戒滑稽豈願曳華裾春城絃管  
春如海多少蛾眉笑喫虛

御紅千盞抵千團園主輕拋客惡灘三載歸來  
歸便去花開却讓別人看

慧郎赤牘踰淮至說道渠爺遽棄家移向軒轅  
臺頂住鹿牀輕載獨輪車

裝潢莊嚴賢伯仲畫中真贗辨精麤寒家一厨  
付火却只賸鉤金灌佛圖

談笑項侯妙天下撐腸拄腹多異書壯哉尚欲  
走輦轂鞭掉西風秃尾驢

一瓶顏色勝秋泉留待相逢話洞天落葉打頭  
如過雨倚江樓認孝廉船

陳三與我稱至友年復年來悲斷萍試問蕪城  
苦吟客落花憶否鮎埼亭

七年不見朱循吏往事漫漫如掃塵聞說休糧  
買山隱白髭鬚稱罷官人

片石岡巒各殊狀果然娥媚若煙鬟紛紛誇有  
空青府可敵玲瓏繹望山

琴傳樊氏古良工君赴涼廳彈塞鴻堂上槐花  
飄一寸七條絃在水聲中

沉湎直可呼黯伯朝朝醉死忘頽齡有時誑我  
說斷飲怕我上天囚酒星

蟬腹龜腸清若無九朝三食真仙儒井闌淘米  
日趁影一笑騰騰據竈觚

童時頑劣逃邛塾連臂比鄰蕭八郎不識春光  
是何物白薔薇底捉迷藏

散職舊銜冰樣清初刪首宿又發萌糟牀漉酒  
留客聽家婢合和骨董羹

收藏三百十種帖一舊榻浮古香乞君題遍  
極攷訂爛紙敗煤重開光

金牛湖上漲層巒烏榜紅舷昔共歡纔看拋壻  
過冷節落花飛絮滾成團

今秋鄭國歸來後即訪荒齋賭酒尊團坐繩牀  
夜聯句百蟲啼雨葉堆門

樂府十篇音節長衆中猥誦風騷狂莫教傳入  
京城去驚動麗眉老侍郎

畫蘭竹自題紙尾寄程五鳴江二炳炎

寫竹兼寫蘭欹疎墨痕吐一花與一枝無媚有  
清苦擲紙自太息不入畫師譜酬人分精麤妙  
語吾所取鈐以小私印署名隸書古半幅懸空  
齋色香滿巖塢隱坐整日看冷吟獨閉戶飲水  
張玉琴斜陽忽飛雨

江上遲厲二鸚

疾琴有澁聲昨夜雨不止嗒然罷空彈獨立當  
門水新漉酒一升冷熱味何似墟煙山葉中知  
君來曳履



近溪菴懷亦諧上人

菴改團瓢形溪迷白沙路十年不來遊經行憚  
寒洹皛皛銀色雲盤盤螺髻樹夙愛軋氏灑永  
懷已公句可憐在山僧三徒城中住

曉登樓霞嶺歷水樂洞轉憩慧日精舍覓  
壁上題名汎湖而歸雜書二首寄昔年

同遊王嬰周京司直金士章厲鶚汪潭臺

諸朋好

羃靡雲容翠巘寬此間濟勝若驂鸞野梅苦竹  
無人見破曉冰霜各自寒

煙林葉盡聲如掃，山鳥日高啼已空。  
獨立吟成有誰和，一方寒玉水丁東。  
蛛塵蘚墨認依稀，怡張題名身世非。  
坐對諸峯浸湖面，黃妃塔下放船歸。

宿韜光飛雨軒

隙塵抖擻上方眠，飛雨軒中暫息緣。  
試問蒲團琳長老，可曾聽厭滿山泉。

小善庵予別業也，舊鑿硤确得泉涓涓，冷  
泠厨僧常取供之，因作是詩。

摘泉鑿石根，我家青芝隴。源非黷而惡，蒙蒙天

奧府疾風中多纏怪木上欲齧洞深納積陰雷  
雨不敢洩入山瓢杓喧引供歲沃沃僧厨十二  
筒斷竹復續竹擊聲若礪礪高秋聚沆瀣三漱  
勞舌神可以消宿憊

臘月二十四日江上無事因出家醞要諸

鄰翁小飲

曾讀逸民傳南邨舊隱人滄清江圍屋樹寒雨對  
牀人歲晏藥苗路花開酒國春依然敦漢俗祭  
竈請比鄰

江上歲暮雜詩四首

內史書蘭亭絕品閱世久風流翠墨香得之獨

漉叟

舊為劉山人所藏

楮爛字畫全光華神氣厚舊傳

七遺民淋漓跋其後惜為老黠工名蹟已割取  
櫝去珠尚存何傷落吾手少日曾習臨摹惟羞  
新婦自看仍自收空箱防汙垢一事勝辭師未  
飲缸面酒冬心齋中石刻禊帖

有物爬沙行合眼聽怪絕索索復苴苴天寒一  
夜雪撒鹽與鋪糝清曉生萬潔牀琴凍折絃巷  
門荒脫闌主人病耽愁澁縮中陰閉身比枯木  
僵心如宿火熟坐失江上山微茫辨明滅新添

空澗中泉聲日嗚咽雪

高生作畫圖送予還鄉土淡墨善工愁至情寫  
終古鬱鬱刺孤城惜惜飛小雨戢香江南山樹  
有別離苦恍聞吹浦笛又覺打津鼓吳艘一霎  
行朔風渡揚子叶抵家市月深悶懷若墻堵展  
軸每思君何時奉清塵

題廣陵高翔送予還錢塘山水軸子

古鏡破難照中斂寒月精么錢薄無用上漬丹  
砂明嗟吾兩不如萬事忝所生可憐窮鳥賦鄉  
人多譏評

戲荅楊三十五知

雪夜懷吳興姚秀才世鈺

密雪廳空閉明鏡葉掃多思君若若樽酒寒夜可  
來麼

書和靖先生集後

不婚不宦失津涯身後高名動慕嗟畢竟有人  
廬舍側俸錢治墓服總麻

冬心先生集卷第一

離于廣陵殿詩廟

離正祭五十四開

冬心先生集卷第二

錢塘金 農 壽門

章正繡江亭寄杭孝廉士駿桑貢士調元  
賺得閑情半日看繡江亭似散花灘綠差差水  
鄉心動只少東邊鬪鴨闌

樊川雪後至西坡庵尋陳文貞公題名

餘雪媚樵徑精廬策杖行眼明半峯影心洗百  
泉聲馴鶴襪襪立朝曦曖曖生樊川陳閣老巖  
壁有題名

與陳學士壯履晚食戲成三首



漫道蕭娘纖指同熏人辛味出梓中何能強食  
過三斗酷吏寧逢屈突通

昇仙事渺髮斑斑銀押生光釘坐閒我是江南  
未歸客一拳如見潤州山

雪虐風號食飲凍醅圍爐偏向夜深來可知印綬  
尋常物只博丁郎啗百枚

春雪

春雪玉塵飛春風柳絮稀薄寒欺網戶清豔妬  
羅幃斂袂奩綦掩哦詩篝火微小遊仙有夢今  
夕降真妃

伎席詠落梅二首

比翼青禽去不回  
花枝轉惜十分開  
粉絲已退  
衣香減空捧銀槎  
唱落梅

離笛含愁綺席春  
橫汾咫尺隔芳津  
而今月地  
雲階別玉女  
牕中夢綠塵

匠里

匠里聚邨落  
高春湛露晞  
溪清鑿堯韭  
山野賸  
周薇風以淳  
初古人多道  
勝肥耦耕  
今不廢  
椒醕共春析

聖王坪

訪道通幽象仙山視聽殊鶴鳴知子午松吹叶  
笙竽香霧迷三里天漿散百觚肯教容易別瓊  
月閉金鋪

石淙院與禪人茶話

虛空同瞑坐監拂老湯師一夕莊嚴論三生茗  
果期花宮何窈窕藥樹自逶迤不厭春泉沸淙  
淙檐下垂

桑林

遺蹟桑林舊熙熙物態舒地猶傳谷飲人半雜  
麇園居匿市春山遠冥濛社雨餘回瞻請禱處如

侍六龍輿

吉祥寺泉上十韻

新霽來山中精舍騁遊眄始入灌木陰稍深冷  
風善維南豁平疇極西從聳浮巘靜雲一族居幽  
澗衆流行沈出浸淺莎濫時破重蘚瀟瀟靈液  
華洎洎連珠演手斟不亂清口飲有廉辨即此  
澹交訂君子意非舛惜哉無名緇綠塵鬪茶薜  
明朝續水綠石鼎攜松筴

過北碕精舍得宋高僧手寫涅槃經殘本

即題其後

欲嘗米汁來禪扉孤松解帶剛十圍向日苾芻  
香馡馡馴禽相對無妄飛懺堂拭案白拂揮漆  
龕朽壤生蛆蟻殘經一卷認依稀口誦深悔前  
毀誹彼國長者忘是非文字不作陰符機聖僧  
手寫心弗違朱絲闌好界畫微法王力大書體  
肥肯落人間寒與饑閱歲六百方我歸如石韞  
玉今吐輝此中妙諦多福威昆明浩劫增歔歔

緋桃花下喜雨

東風作惡春無據花上浮塵吹不去忽聞好雨  
浙浙鳴虛廊灑瓦天將曙轆轤井畔紅嶸嶸天

桃漸破含笑迎一枝半葉三沐浴從此穠華分  
外生

伎席

丁香花弱飄成泥東家蝴蝶西家飛春風三月  
細馬騎秀靨破玉雙着齊下馬入門戲牽衣繡  
韉餘煖無人知觥船鱗鱗一棹迷琵琶笑撥月  
色肥金源曲子聲如絲外洋粉巾來索題釵光  
鬢影紅袖圍冬郎豔體賦贈誰銅蠹暗咽烏夜  
啼醉鄉勸住歸不歸對面何須生九疑

蟾子

雙燭生花送喜頻紅絲蟠子漾流塵不結綺牕  
雕戶裏恰無人處上羅巾

山中吉祥草忽爾吐花抽莖高出葉上連  
綴紫萼若排粟然顛之妙香逆鼻真祇  
林幽品也古老嘗云十歲始一開終鮮  
有見者今獲覩此實予之厚幸矣因賦  
轉韻五字詩記之

護草可忘憂青棠能蠲忿何如吉祥花伸着開  
笑吻葳蕤抽亭亭攢萼明龕燈一領紫袈裟恍  
對天台僧善相本端然忻忻若舊識莫使姪女

來亂汝好顏色澗風無繁聲逆鼻清香生轉恨  
九節蒲仙茸空負名

送賀十五德輿之辰州

五月沅陵道毒淫多畏途滑稽齊贅壻潦倒楚  
狂夫霧嶂砂牀暗蠻溪銅柱孤此行悲老馬誰  
與秣青芻

送性原上座還青浦

夢醒槐根日未晡願聞妙法闡醍醐石人閉口  
寧相妬蓮子空心自不汙成佛莫教靈運後彌  
天得似道安無袒肩持盃師歸去如蓋涼雲薛



澗湖

攜客步至七柿灘望樊山

各領清涼味惛惛邛鳩塢深沁脾向花水張腋立  
風林君作洛生詠我彈越客琴芙蓉山九點濃  
翠撲衣襟

梅子岡

引眺梅子岡林端曲盤上雖無一鶴隨已與孤  
雲往飛瀑暢秋源前山開翠幌叉手立移時庵  
門揭茶牒

石間道院

屣屣俯石間赴嶺得幽造花癯向夕斂水活入  
林冒願要白兔公齋房誦真誥啖芝七孔明心  
光翳盡掃

遊王屋山

不駕短轆車不騎伏櫪馬手拄猢猻藤獨遊到  
巖下松枯風稜稜亂石如墮星留我三日任雲  
白山轉青衆山列修眉野雲覆成幄朱衣鳥一  
雙其音奏韶樂靈藥滿目前傳聞灌香泉年年  
長芝木仙官亦種田

尋孟尊師草堂

名公先生集卷二  
遺蛻懷仙史翠微通草堂何時安藥白于此置  
繩牀叩玉陰泉出如人雙樹長嗒然白雲外巾  
鳥得清涼

水經注云析城山中有二泉東濁西清左  
右不生草木今遊斯地但見灌陰鬱莽  
而已靈源故道失其所在感賦此詩

峭閣飛梁想洞天山中遺跡已千年無端草木  
叢生綠不見東西清濁泉

樊口西郊行藥

何處病眼開荒荒割昏膜不著比正衣尚留居

士儔樊上得延佇信步歷榛薄孤壑清磬空諸  
峯白雲各此閒微徑僻斜景閉墟落誰識地隱  
人時來一行藥

龍涎香二首寄吳秀才焯厲孝廉鷄

氤氳盤裏驗香煤如帶龍堂曉霧來懶與人閒  
鬪檀麝夕熏睡鴨已心灰

方壺島客渺難逢一餅淒涼話故宮南渡銷亡  
天水碧空傳樂府補題中

憶康山舊遊寄懷余元甲高翔馬曰楚曰

瑄曰璐王士慎

曩哲風流地朋遊數往還飲盟無筭爵花社一  
家山談藝揮犀柄填詞按翠鬟相思渺天末腸  
斷茱萸灣

寄丁敬

被褐臧榮緒耽貧范史雲立言敦雅頌取友別  
藉薰蜀郡草堂集陳倉石鼓文何年共幽覽矯  
首海鷗羣

懷吳門陸嶠

公子美無度讀書吳郡閒門留鬱林石牀對小  
雞山終歲淹秋駕何時綴玉班殷勤通旅夢細

雨穆陵關

吳江朱志廣下第後聞作粵西山水之遊  
詩以懷之二首

席帽奚傷落羽悲  
曉舜魏闕又天涯  
白藤書笈單車出  
誰送才人沈亞之

玉笋瑤簾山態新  
灑江正好浣縑塵  
桂林風土君須記  
聞說梅花也瘴人

遊天壇值雪

璚房瑤室路幽微  
晨降雲輶萬玉妃  
記取年年石幢側  
仙人剪水作花飛

憩王屋山後十方院二首

斗室虛無隘九州蕭條還作采真游  
黃梅花坼融朝霰疑是銅仙鉛淚流

大椿靈餌話堯年鍊液升煙日馭前  
玉女投壺天一笑人閒何苦種桑田

樊川梅花下獨酌懷沈助教閔述蜀中

一株忽見謝公墩無數花鬚綴玉痕  
香墮酒杯隨入口影斜苔閣正銷魂  
風塵不憚冰霜路家世應知水月邨  
驛使難逢空悵立故人芳訊隔

彭門

東峪訪馬山人復圖卜肆

高顙稱狂客端居證道情  
避人華獨坐請雨束  
長生呼吸天關闢神明  
水鏡清襟著兼布卦江  
國問歸程

寄贈陳徵君約

辭却三公位桔槔日灌園  
中林絕蕭艾隙地長  
葵萱避世子孫樂隔雲  
雞犬喧龍門山可到九  
曲探河源

春苔

漠漠復緜緜春苔翠管圓  
日焦欺蕙帶風落笑



榆錢多雨偏三月無人又一年陰房托幽跡不  
上玉階前

樊口

名山一百里樊口似丹正巖戶雲孤注花源水  
四周塵袂持隱訣松卧恣天游桑苧江南客風  
流老此州

寄家書呈江上諸兄弟

燧易星迴遠報書鄉愁如瘡笑驅除數莖白髮  
千杯酒九曲黃河雙鯉魚中歲弟兄貧亦好全  
家煙水夢何疎海鮮橋外樟亭路無賴春風三

月初

老子祠李花

月夜長明洗眼昏  
上清一氣貫仙根  
玉鈿霧縠休輕比  
恐汗玄元七葉孫

平定道中

雨後春流瀉黛脂  
李諍作頌託微辭  
行人飲馬來偷見  
一陣花飛妬女祠

悅公溪上紫藤著花

覆澗藤陰合  
開時瓔珞同  
百年無夭闕  
三月正玲瓏  
弄色魚鱗上  
吹香佛鉢中  
吳興思髮鬢  
弗花

瀨紫濛濛

晉陽遇同鄉李叟載通二首

記室相逢幕府清  
玉溪箋奏擅才名  
婆留鄉語聽來熟  
恍在春風衣錦城

白髮蕭蕭映綠尊  
每談古蹟黯銷魂  
明朝殘樹殘山外  
一弔離宮賀六渾

遊晉祠

叔虞祠不改  
水木發清妍  
藹藹長生樹  
泠泠難老泉  
影如青繖立  
味在玉漿前  
更領涼堂趣  
風中揮七絃

次香山驛

香山驛斷飛狐口折臂難誇射鵬手昏靈眯眼  
脂流泔欲覓清陰少楊柳左驂右駢何足奇但  
恨匹馬行庭羸稊田米賤那得食短後之衣風  
披披吹角嘶笳本游邏忼慨悲歌有誰和百里  
宿店馬亦飢飲嚙滿腹槽下卧我心兀兀墮渺  
茫不隨騎吏隨編郎富春江上足煙水涼笛一  
聲汀草長

題青林溝所居

塵分炎光晝已空投簪久羨濯纓翁鮮花活水

山中路輕筴是織絺林下風烏榼一雙貧不廢金  
丹四百老彌工何年得遂茅茨約黛色玲瓏遠  
可通

唐檢討繼祖除祠部郎中有寄

南宮典禮出蓬池星位推尊衆所知舊日文名  
沈家令新年官職趙中儀冰廳風冷披香早藤  
格花明退食遲若夢江湖應念我投竿釋褐渺  
無期

詠頻婆果二首

晚涼纔過浴蘭時一種甘香欲墜枝爲語玉溪

溪上女不勞紅豆寄相思

燕脂塗頰粉肌明  
瑤席新嘗別味清  
翻恨炎州鮮荔子  
祇同風露不同生

月夜紫薇花下有懷陸舍人慶元陳吉士

師儉

如聞仙漏暗泉中  
冉冉芳蕤月浸空  
今夜應知宿清禁  
青綾客對紫薇翁

午亭山邨陳文貞公居里也去公薨後十  
五年予乃遊其門與嗣君學士爲筆札  
之徒每企公之清德餘風合乎古而不

可沒者因連綴成篇計得小詩四首較  
之夸毗無徵之音微有異焉

獨持清德道彌尊半飽

相國自號  
半飽居士

遺風在菜根

廐吏尚然思楚相棧車牝馬久無存

河嶽精靈絕代誇恥居王後論詩家辦香一脈  
纔如願蛛網梁塵拜絳紗

溪上青山接太行午亭便是午橋莊能消裴令  
生前憾繡尾魚今尺二長

令狐學士被恩齊趨步曾登白石梯夾道槐陰  
門似水雨餘好護舊沙隄

汾州于郎中灝達貺隄廩戲報三首

古香清不醜一挺復一螺老夫亂塗抹却勝畫  
雙蛾

羊真孔草已矣書法以心爲師昨日墨池乾涸  
重開花更淋漓

蛇孫蛇子久摧枝那數松煙含綠滋磨向晴牕  
鉤石本崇徽公主手痕碑

過濟勝講寺

入寺戒壇古遠風吹塔鈴空廊且鹿麕飯淨手獨  
繙經林瘦多病葉鶴孤自長齡連宵有山夢夢



見衆山青

湘中楊隱士茶寄遺君山茶片奉答四首  
茶稱仙掌夙曾聞白綃紅鈐遠寄勤除却巢兄  
無別客開函疑有洞庭雲

安得中泠汲滿瓶楚狂毀後愈芳馨煎時若入  
薑鹽味豈異羸秦施五刑

明嫿山容茁昔天疎寮涼院證因緣笑他紗帽  
籠頭坐水厄虛名直浪傳

八餅何須琢月輪不如細啜越瓷新漫憂銷耗  
通宵醒元是秋堂少睡人

東岡卧病

蟾蜍兩歲照秋林  
忽忽奚堪百感侵  
久別金莖分草露  
頓忘碧海守蹄涔  
西方尚競椒蘭氣  
北里新除鄭衛音  
敢與王郎比朝隱  
愛閑多病閉門深

秋雨小止雜書遣懷簡陳學士三首來日  
擬作九女臺之遊

層館竦且清  
人定無喧黷  
合抱樹鬱鬱  
欒連陰  
雨淋漉  
滴如寒漏  
聞夜比華池  
獨披書燭  
幢幢恍陪玉堂宿

先生慕渴羗飲酒若決渠山中時拄笏花底仍  
懸車近從農圃言續記齊諧書物理不可測朽  
瓜化爲魚

玲瓏洞陽東前月窺天柱縹緲王屋西昨秋踵  
靈府晨擬導沁流遐矚希風古攬身九女臺峯  
峯弄睂嫵

十五夜對月有懷淮上舊遊

素華先夕淨雲霾忽到尊前分外佳已驗珠胎  
隨影滿可憐玉鏡借光揩西風一桁秋河路涼  
笛三更鴈齒階記得天涯流恨處照人頭白是

清淮

石閭曉起將遊洞陽山中

流影西斜月帳空披衣獨坐尚朦朧  
依人香草如湘曲爭日清猿似峽中  
眼界明來千障失心苗開處九關通  
無煩市上壺公術好御仙山離  
合風

登陽臺觀

清齋朝盥入山行恍忽松幢葆蓋迎  
欲向月田除桂蠹願從雲海訪芝精  
心如絳闕三池滿足比青禽兩翼輕  
歌罷人間可哀曲陽臺觀側竊

留名

客來自覃懷見餉地黄奉酬十韻

客遊枋口來顏貌溫而癯遺我地黄好翠莖連  
根株言采藥櫃山經宿色不渝靈品彰土德流  
膏蘊精腴吾衰氣血耗六府如空鑪何能協風  
火兼之固機樞久服自竒效導行登天都入夜  
視有光心淵生寶珠抱朴語頗誕此物非青芻  
敢云飼老馬報君以良駒

往歲逢閻敏于襄垣道中旋即別去近傳

流寓鄒魯間短句奉寄

去年芳草畔揮別上虎亭今夕涼波外相思小  
洞庭簌簌聞墜葉歷歷見明星試問東阿客曾  
招帝子靈

寄王三孝廉斐并訊城北舊游諸子

激箭風高落木初思君終日歎離居山重水渺  
雲難合春北秋南鴈不如八柱桂堂知習賦一  
牀湘管定工書墟頭嵇阮常相見亦念殊鄉野  
鬢疎

晏歲山舍夜卧

峪中氣淒厲晏歲百端結木墮山趾寒泉枯溪

腹泄夜惟粥  
錦親書就燈  
梳閱通塞非  
不推吾  
生秉苦節

雙雀二首

交飛凍雀意相關  
啄穗悲啼往復還  
漫道不逢生處樂  
野田却勝紇干山

未許明珠逐後塵  
豈同寡鵠仰高冥  
烏桓城廢空倉冷  
誰唱雌雄雙白翎

白丈慶餘見招以豆糜爲食走筆記之

草蟲亂啼豆葉青  
溪雨變涼豆花明  
二七爲族極蕃衍  
莢肥偏向硯田生  
雖無畛域有行次  
秋

成不讓嘉禾名丈人年年自刈獲筐之筥之儲  
豐羸是日急雪大如掌冒寒招我勞邨氓一盤  
脫粟異春確菽乃熬粥養作羹咄嗟而辦諳古  
法流匙滑潤含芬馨縕絮共歡致足飽奚用羊  
臠方登釧此鄉昔聞閔仲叔弗求滋美充容形  
平居造席只周黨輒供斯食屏膏腥我與丈人  
稱至友調飢頓釋空腸鳴破冰得水漱口齒起  
立更覺迷晶瑩山中路斷見虎跡翔颺獵獵欺  
虛櫺

立春日荅張巽



如苔池水將鎔色似火花枝已釀胎此日芹盤  
爭送菜春風暗裏逐人來

冬心先生集卷第二

雞正菜五十四開  
難于廣陵般詩廡

冬心先生集卷第三

錢塘金 農 壽門

遊海會寺

青陽更始正春融拄杖來遊此寺中陰壑斷崖  
泉出樹飛簷浮柱塔生風經殘未覩番書妙佛  
古猶傳朔像工嬾學朝天奏韶護自憐蹤跡一  
龕龍同

卷髮曲 有小序

卷髮曲悲彼姝中棄而爲房老也予寫  
其紛亂之思託已之微意焉噫同情者

可以怨矣

舞釵股折粧鏡沒膏沐羞容衆芳歇黃支之犀  
巧琢誰偏似天邊未圓月欲理翻愁同亂絲趙  
家新髻儂不知一梳再梳已決絕那復纏絲是  
舊時

遊竇氏別圃衛秀才惟順相邀過其草堂  
閑話

駘蕩春遊戀物華已忘寄跡在天涯活禽生卉  
看滕宅石礎松櫺過薛家巖隙尚須牽月幌酒  
中只少泛星槎潛機幽蹟皆名理衛玠清言似

永嘉

題郭外人家種莎

滿徑移莎短鋤稀閉門春雨鬱生肥  
勸君牽犢扶犁去好織青青襪襖衣

兔坑之陰有野花色如退紅每迎朝陽而  
開惜未及日是則飄謝矣因成二首

暫沾朝露領朝陽鏡裏朱顏似窈娘  
半日謝背人偷泣負風光

野叢浮艷自無名却恨新恩頃刻傾  
若把紅枝較榮悴從今暮槿號長生

與謝山人夔池上弈二首

方罫楸枰布勢遲，鈎連小劫動偏師。  
隔宵涼雨波如簟，想見銅池滉漾時。

臍膊聲中黑白機，茶香蠲渴味心微。  
西南風急舟幾覆，一角何人笑解圍。

感春口號

春光門外半驚過，杏靨留桃緋可奈何。  
莫怪撩衣嬾輕出，滿山荆棘較花多。

邯鄲花謝曲爲廬江應彤賦

月頭月尾花謝開，春雨春風客去來。  
冶遊潛在

邯鄲陌酒卷白波一百杯而今賸有衫痕濺題  
字柱心空照面可憐掃地軸簾人前閣後堂都  
不見建安才子動猜嫌那復聞歌阿鵲鹽久虛  
消息通魚鑰枉說清陰窺畫檐簌錢聲寂莎階  
黑隻影相思長悵憶隱語徒教休洗紅燕支山  
遠無顏色勸君收淚莫偷啼手弄狂塵爲破迷  
畢竟東南孔雀故巢好雙飛終解共雙棲

慕園題竹

便娟修竹覆欄楹出格幽姿天與成薄粉分沾  
何駙馬清風合置薛先生湘中未掩含啼態淇

上空添掃翠情不見鷓鴣殊脈脈可知佳筮復負  
虛名

重遊王屋訪唐開元時御愛松并韓抗爲  
司馬鍊師書刻石不得小憩陽臺觀抵

暮出山

行尋御愛松偃蓋杳無迹憫茲百木長縛炬遭  
幽厄又訪遺教碑批荅獎真籍韓康賣藥孫狂  
書失鈎畫二者渺莫逢重來空念昔願遊不死  
庭丹元嚙津液滅景走三尸潛光鍊九魄此閒  
陽臺觀髮髯弗軒轅宅芝園納流霞蒲澗委玉鳥

我欲近掇之左神恐呵責學道苦云晚取誚古  
逋客日落毛髮森出山悲天窄八極騁輪蹄難  
追崦嵫迫

橫山舊廬獨吟

朱夏慕閉關煩瘡或消殄子子人跡稀離離花  
光泣列岫窓靄蔽微鐘磬路緬松下白骸輕清  
風勝和扁

松花

五粒三鍼想物初非花非霧伴潛居麻姑滄海  
塵相似炎帝香蒲粉不如雲蓋結時朝絳節鶴



巢傾處點青裾果能服食身輕舉還熱陰脂勘  
異書

孤蟬

已散青林樂孤蟬送夕颺露涼金鴈驛柳斷赤  
闌橋枵腹無全飽枯形非一朝遺榮守清節不  
共侍中貂

張二丈伊以白苧布見遺感作十韻

白苧一匹新出機銀光爛爛雪澆澆阿翁笑贈  
意良厚却勝祁陽之輕絺周官書載斲各好疏  
物更見風人詩其長四丈濶尺五績密何減冰

蠶絲感君知我有野性裁成曲領寬袖衣罕逢  
綳纈少苛禮梭鞣桐帽方相宜今夏此邦多凋  
瘵糾纏疫癘民苦飢旱魃搆虐土龜坼雉雷晝  
鳴雨不飛胡爲卑處受毒熱鄉心早已歸江湄  
準辨松毛縛棚香透屋涼颺穩卧黃琉璃

初秋養疾樊上

巖居養疾遠郭壘葭木多干粥飯綠秋澗曲流  
喧枕上槐花一寸積門前未忘舌本思今日尚  
損腰圍似去年雲笈珠林從妙悟絕勝騶衍共  
談天

榿山寺示諸僧衆

疊嶂鉤連擁磴斜  
迦藍齋會設無遮  
佛煙聚處疑成塔  
林雨吹來半雜花  
年記鼠兒碑尚在  
山尋雞足路還賒  
欲求文字資禪錄  
須辨緇帷茗一車

寄贈于三郎中山居四首

身離束縛卸犀圍  
白袷披時少是非  
抖擻絕無塵土雜  
豈如十日澣朱衣

彤闈瑣闥了前因  
省直年光夢未真  
試問仙曹春雪裏  
乳毛松格屬何人

藥苗五葉當蔬畦穩卧家山丹竈西久別觚稜  
朝謁早淮南不養汝南雞

而今隱作爛柯翁三百枯棊誰與同一詠覆圖  
聞雨句秋鐙却憶鄭郎中

### 菖蒲

菖蒲九節俯潭清飲水仙人綠骨輕砌草林花  
空識面肯從塵土論交情

北寺水廊聽雨有懷虞十八以潛

僧廊聽雨寫明珠塵垢齊蠲煩惱無忽憶綠蓑  
青笠客池邊合眼即江湖

中秋夜翫月感作二首

當頭無翳欲梯空畢竟銀潢潛可通世上浮塵  
與織浪不教闌入玉輪中

蟾戶光明盼一年露盤濕桂又涼天須憐今夜  
金波苦何處團團照粉田

東岡之下老屋三楹陳文貞公讀書處也  
予嘗遊憩其間懷企有作

秋氣斂虛館東岡生道心林疎風脫翠山暗雨  
添陰既有出煙磬復多聒渚禽六時喧寂意欲  
繼謝公吟

海會寺池上觀魚呈道禪師四首

不戲田田蓮葉東浮陽吞餌樂無窮阿師撫掌  
留公案大海何如沸鼎中

紫鱗勿損有懷珠活潑天機相沫濡未必歲收  
千百利堂堂策策少驚呼

憑檻風來聚藻涼可知聞法喻空王撒波逐隊  
爭迎我錯認臨江白石郎

八功德水溯靈蹤清淨雲山覲面逢恍在放生

池上坐拋殘香飯聽湖鐘

吾郡西湖上有放生池往年嘗遊其間觀

僧施食

東園望砥柱山

砥柱峯高儼帝囿每于檐隙挹鮮新酒場莫負  
今朝約風掃疎林雨洗塵

白鷗詞

有小序

蕭穎士之言曰白鷗羽族之幽奇也神  
貌閑暇不雜于衆鳥人莫得而馴狎之  
若絀乎籠樊之中殊可慨已茲覩其羣  
趨拘囚之狀似類予者因成短歌珍禽  
有知能弗引吭悲鳴一和予耶

白壁一雙買白鷗主人三載愛漸慳朝來不飲

亦不啄何日開籠返故山素襟難易原太潔身  
若穹廬古時雪安得見爾生逢南越王西京貢  
入趨步隨鸞鳳

上黨道中二首

霜驛平分朔鴈程天連上黨識雄名他年若掌  
周官樂好驗山中牛鐸聲

尉火斗臺荒漳水寒壺關西隔路迷漫達峯挽髻  
雲堆絮偏在匆匆馬首看

聞喜縣中早發行四十里宋秀才士諤乃  
出豐饌相邀午食因紀長歌并以述連



日勞役之不同也

驛鼓統統打五更羊胛已熟東方明落葉滿頭  
人曉行馬蹄鬆快沙路平轉憐前日歷奇險左  
縈右旋皆山程午攀峯脊穿嶺腹恍如百級登  
梳搖懸旌其上石門東關鑰窮陰出鬼舍怒獐  
人馬困憊欲齧咋解鞍投枕舒煩情今朝坦屣  
筋力健况復曦景鮮雲生當年韓趙空戰鬪時  
清安有烽煙驚絳水涑水渺何許徒令懷古吁  
交并邑中才藝數裴秀後來領袖多儒名襄陵  
之酒果易醉西郊汎醪勞相迎脯腊腴腴非不

飽未免秋風刮面思尊羹

詣庶滋上人齋堂蔬飯望中條山

淨名已悟小輪圍紺宇精嚴一歛扉孤竹瘦於  
尊者相野雲白似道人衣何曾心地妨禽鳥且  
向齋堂飽蕨薇試上莓梯腰脚健中條山色見  
纖微

入王官谷

栖逸王官谷清暉日夕娛一池寒藻合三詔舊  
堂無荒壟除山稅東菑足晚舖土風稱習儉仍  
不改唐虞

蒲州劉高士仲益隱居不仕時時斷炊作  
詩慰之二首

林藪惟知味道腴長貧何用計華枯解嘲却笑  
丹陽尹一斛檳榔消食無

我亦枵然人外閑飢腸時復破天慳采薇歌罷  
鉤簾坐飽看君家雷首山

書乾癭子郭汾陽事

旌旄開府攝兵戎永鎮蒲州郭令公自古功名  
堪一笑元來河瀆親家翁

渡黃河二首

沉璧曾聞致太平龍門竹箭疾流驚星源自解  
通銀漢豈待千年後始清

喧豕怒觸起盤渦曲憶筇篻怯渡河從此登車  
問騶卒夢時可有惡風波

前年邂逅郭十一詹吉于滄州昨歲又遇  
于沁縣今秋予過登封意外把臂感而

有作

康莊迷軌失亨衢潦倒秋風獨向隅萬竅不休  
悲宋玉一毛無濟泣楊朱日斜黃葉先朝寺山  
映青旗賣酒壚話到前期更憐汝三年三處客

音殊

舊有寫經研自爲銘曰白乳一泓忍草一  
莖細寫貝葉經水墨雲山粥飯僧屬廣  
陵高翔以八分書之汪士慎鐫其背往  
歲攜遊京師僦居慈仁寺六月多雨青  
苔及榻客厨時時斷炊竟易米于貴人  
矣今偶登嵩山過片石菴閱釋氏之書  
休憩樹下忽念故物率成二詩詩中雜  
述所感不專言研也

紫衣三載已飄零筆墨無緣再乞靈今日齋堂

空一飽思惟樹下悵繙經

手閑却懶注蟲魚且就嵩高高十笏居到處雲山  
到處佛淨名小品倩誰書

過玉晨道觀潭上

潭上淨難唾坐見新泉豁竄竹不爲喧瀟雲始  
覺活代黑影幻所思狂名戒相掇如在洞霄宮尋  
源一杖撥

中條山下人家

蒼翠中條路人家荒史前逃名却蒲帛無象喻  
第筌廣場勤春稼長廊畫古賢好將山下水一

灌凍陰田

坐洗藥泉上出匣中雷氏琴手絃而口歌  
之

琴古之子遺黝面心匪爛今出幽匣中零落殆  
已半所幸五音全和平不我叛客居若架巢女  
蘿以爲幔一曲楚明光緩爪自澡盥彈無剗絃  
憤聽有捐斤歎松吹遏流雲溪籟激清旦謝彼  
撼鈴人毋來女姦聲亂

寄盧郡掾叡

之官已三月高卧狎青冥牀上列茶脯花間鑱

印廳無言慕刁琰大道問瞿硎聞說謝曹掾行  
尋千歲苓

過茹柔仁者方丈禪話

方袍林下緇相見折松枝古水自荒裔連峯轉  
委蛇龕深寂無垢雲白淨如篩後佛衆前佛清  
涼生四肢

題湘陰女郎畫竹三首

粧閣流風洗黛痕管夫人法卷中存生來不畫  
紅花樹怕見倡桃笑倚門

竹枝新長楚江頭便有煙昏細雨愁若說無心



心最苦斑斑湘女暮啼秋

物外嬋娟用意深此君寫照在虛襟散傳南國  
知增價豈止吳兒一鎰金

儵居玉溪與無悶講師精藍相近屢過率

贈

聽法何心發愛涎溪光汎汎石粼粼一牛鳴地  
時相見雙樹影堂還結緣消受佛香方外客潛  
通茶夢定中天南宗釋老門風在拔苦元來出  
四禪

盧郡掾官齋銷夏即事有贈四首

笑釋形拘坐綠槐黃梁未熟睡先催問君轉乞  
邯鄲枕入夢無須出夢來

濟源水味恨難同茶事殷勤羨乃公野竹也知  
能請客暑風都變作清風

冷金牋上五言多才子偏教鬢已皤花塢夕陽  
吟更好而今大曆勝元和

退耕決計話抽簪九品官資七不堪攜手山妻

鹿門隱草堂何必在終南

君自秦徙居楚中近二紀矣

秋雨坐槐樹下書懷

昨宵娟魄明銀蟾似水激激棲短檐雲翳那礙

半影好露洗轉覺清光添低頭思鄉了無益三  
更著枕垂風簾今朝袷衣換敝笥滿城秋雨飛  
囊靈陰晴之理意難度豈能乙巳窮窺占階前  
老槐十圍大碧羅張繖高厭厭花開未落葉忽  
落可憐樹亦生涼炎嗟予朱顏就沮喪口鮮滋  
味非醯鹽方枘圓鑿匪所用顧者却避多猜嫌  
客嘲賓戲深且險伯尼反貪盜跖廉江東士氣  
乃不振堅守中壘提封嚴何如傭書鐵佛寺寫  
經一卷直一縑

懷甬東邢十九大纘秋試二首

高槐纂纂繁報花期花愛秋黃弄雨絲遙憶西陵  
渡江客擔書可有餽船資

白頭未嫁守家機周召餘風好發揮料爾今番  
領鄉薦三杯仙露換麻衣

懷張機客淮陰黃樹穀客廣陵

清淮淼淼接雷塘二子淹留各異鄉心跡無聊  
如賀老風流不墜在江郎對花鏤管知爭巧乞  
食吹篪也覺狂念否春華戀分袂啣杯相與坐  
藜牀

寄盛上舍綸二首

江墅通僧窟談禪卯色天瘦權與癩可謂字中聖眼兩

師小同坐筓箕泉

里中詞客惟汝苦調潘郎鬢鬢絲今日阿儂憔悴

秋霜也到吟髭

紫琳割得自端州相贈煙光浩不收笑比水田

三百頃代耕何用漏蹄牛春間予曾以手製田研奉貽

茶事八韻

雲根一蹄泉白乳好顏色汲來日煮茶準之自有則離火斤穢薪溫谷用無息候湯毋妄沸司命在盡職復古交牀支甌香淨巾拭檟設品不

同甘苦味全齏何如小峴春獨飲通仙默蓬蓬  
肺渴塵驅去若五賊

八月十五日夜對月寄內二首

一夜光華濯魄新明明穴鼻認來真月中田地  
知多少不見花開散麝塵

刀鏤有夢逼秋期料得家人歌屢屢江上歸船  
杳無信可憐虛嫁弄潮兒

攜酒送客

毳幕韋韞客去初客中送客折轅車晚峯千髻  
煙相妬清酒一罍玉不如冷飲果然添耳熱愁

看從此與天疎馬頭生角烏頭白塞上悲歌磨  
盾書

旅夜聞箏贈別孔氏兄弟三首

彈箏峽裏響宗宗豈是秦聲按瓊牕紫鴈斜飛  
絳河近不教零落一雙雙

開元妙藝幾人知曾拜瓊瓊作女師細數哀絃  
剛十四此生長恨月圓時

夜闌手語動離心我亦聞之淒怨深難免西風  
傷老大恍疑孤艇泊楓林

題賣餅家壁

葱肆漿房半故儒  
康衢賣餅亦潛夫  
淒淒燮燮  
油鐙裏讀罷公羊一卷無

雨夜寄廣陵諸子

一鐙如菽雨絲絲  
揚子橋頭阻遠天  
葉落晚潮  
思楚樹酒添涼  
席夢吳船王曇何減聞歌日  
陸展尤憐染髮年  
通夜蕭騷不成寐  
嗟嗟獨鶴感  
嬌眠

送周郎赴劍州

曲換明珠天下無  
岷沱西去寸心孤  
若逢蜀道  
蕭蕭雨一弔伶人張野狐



懷鮑十四涿州

酈亭流寓注書成自有清資日下名一束腰犀  
須早辦范雲來歲即公卿

送猗氏杜祺孫之雍州

劍鐔扣罷又重看飯顆山前骨相寒天上雙鸞  
求未得河東五犢畜何難且同吟社親書檠莫  
以離杯負菊欄此別霜華快如洗到時落葉滿  
長安

觀獵二首

飛鞚疾于鷲射生惡少年風毛與雨血何苦污

青天

萬事落人後馬筆空有銘不若揖黥卒尚知太

白經

戊申九秋予在太行道中作馬筆銘銘曰滑溪之籐可策而走籐雲籐雲母落人後

嘉定楊謙以水墨畫梅見寄不減清厓長

者家風客牕展看如掇冷香漫題二首

一枝梅好墨淋漓寄自逃禪老畫師所恨未曾

親見得鉤完花瓣點椒時

莫認緇塵浣素衣畧同清瘦是耶非水邊林下

從頭想如此江南不早歸

冬雪

稷稷冬雪深即之在林表噫氣失煖威頑寒出  
陰矯正如客心苦墮落無復躋相警保堅白勿  
使不潔擾

著敝裘寄丁處士江上

羊裘雖敝戀此翁歲久毛禿非茸莢貧憐老軀  
勿可棄故物却與故人同是鄉九月已飛雪衆  
草悽枯百蟲閉披時未抵酒力融身弗煖兮心  
轉熱朱門值得一錢無較之冬綬回寒噓手皸  
欲覓不龜藥江頭泝泝今何如

送西吳詩僧超嬰南歸

詩僧新得靈運孫杼山集好十卷存苦吟五字  
振禪藻家風羨汝真琴瑟臘月行勝趁清旦歸  
去還應弄柔翰冰雪之交花正開佛案寒香吹  
不散

木瓜山下賣花翁見送木瓜報之小詩

不數宣城簇露枝額黃顏色映書帷園官送到  
香如澁正是客心酸楚時

雪中懷汪十六潭客居梁溪并寄王先輩

謝

昔時綠池上聽雪捉觥船此日黃茆外離家負

冬八分生會集卷三  
秋田幾生續流詠何物駐凋年因念夫椒客充  
寒有半氈

懷陳學士午亭山居

思母菴長鍵相違歲月徂高松戀雲壑飛翠濕  
山厨詩擬剡中好泉聽樊口無不須綠玉杖醉  
倒兩兒扶

墮車戲作

衝泥郭外聽鞦韆難覓當壚飲火春失笑連宵  
夢芻狗餓夫翻作墮車人

己酉除夕

客歲更難挽堂堂去寂然自添商陸火誰送水  
衡錢疊鼓聲何逼孤杯味可憐枰中消夜果風  
物憶南天

冬心先生集卷第三

雞正柴五十四開  
撥于廣陵散詩廟



冬心先生集卷第四

錢塘金 農 壽門

元日過張少府小飲花下

仙尉逢梅福同爲上日吟鼻香開酒庫眼亂入  
花林資物春溫早迎人善氣深西山掃殘雪蠟  
屐試登臨

沽酒

沽酒旗亭雪後稀玉缸辜負典春衣新年客味  
渾依舊無怪空瓶耗甍歸

人日寄小姪二首



鼎鼎飛光催客頻  
元辰纔過又靈辰  
池冰忽泮花銷雪  
果信春風是恨人

千里歸情攪晏眠  
何時接手玉華前  
阿咸定爾憐頭白  
嬾逐銀幡鬪少年

憶茶

草鋪綠罽地無塵  
朝日熹微榆火新  
兩串春團三道印  
不知茶宴赴何人

水北蘭若與孔毓  
銘對棊即送歸里  
二首  
僧寮一局子丁丁  
本欲忘機機反生  
筭盡苦心聞見絕  
松無交影水無聲

合離聚散各如何君說還鄉卧礪阿來日休棊  
向歧路路中歧路較棊多

過善師禪林蔬飯

病起維摩招客來鉢囊初解小徘徊澗鐘山磬  
經時聽意樹心花頃刻開昔夢詎忘青豆舍妙  
香尚驗白檀灰從茲斷飲吾何有多事春風勸  
舉杯

訪韋隱君用良山居

先生履屐笑雙穿不礙幽尋精舍前樵斧無聲  
雉登木巖花弄色雨添泉兩朝耆碩遺風邈百

氏菁華副墨傳從此槃游申古訓往來人擬洛  
中賢

東郊客舍寄章十五全人

風襟不整減心情一任牀塵滿把生但覺交游  
無鮑佐幾曾才藝識蕭卿春浮暖陌芳垆遠花  
坼山櫻野館明只合杜門稱嬾放注書且喜腦  
華清

過長林寺

青山傳捨宅一宿去來緣樹下問僧臘龕中送  
佛錢連陞迷壤磴細綆出新泉露地牛何在千

畦欲募田

上巳日禊飲風漪園有懷顧十二韋之客  
洛陽

三月重三節紅敷正好春浮杯曲池映濯髮禊  
堂新絕少衣分麝無煩扇障塵馳情想溱洧亦  
有未歸人

蔡七舍人端富于藏書皆手自精校曩歲  
曾一訪之今渡京江削牘寄予因荅來  
貺

昔訪灑東宅百千萬卷書今來京口信二十六

鱗魚丹墨校無恙寒暄慎獨居臨風答嘉藻何  
日誦瓊琚

雀啄覆粟曲

牛折角車淪泥雀爭殘粟天色黯喑喑嘖嘖聲  
惻悽勸汝且食戒勿語無如飽腹將雛栖昔人  
辨聽反爲累吁嗟從來口舌真禍梯

遣悶二首

黃羊祀竈却無因故智昏昏喪所真天帝聘錢  
何處貸萬緡不及鄭商人

團團朝日出東隅多少驅車九達衢莫晒長貧

河上客緯蕭自可得明珠

有憶二首

涎涎誰憐燕尾長  
芹泥冷落已銷香  
換巢一去非無意  
不愛雕梁愛草堂

紅啼薇帳吐愁煙  
曲榭翻爲杞國天  
回想去年花好些  
尚容酒病老夫顛

紅檐

隔夜擣蒲星陣橫  
四絃愁是子絃聲  
合昏花下澌澌雨  
不放紅檐一刻晴

闕里逢華陽  
蔣三丈衡

昔君訪我蒲帆八幅飽挂東吳船鐵幢浦口立  
談斜照目注寒林煙是時各具豪氣詎屑事屠  
僧君誇強仕頭顱未白我懷鉛槧矜少年忽忽  
別去不相見者踰廿載塞鴻江鯉何處問訊同  
周旋知君遠走秦關三輔地鉤弋宮廢徒弔渭  
水昆明天比歲我亦惘惘出戶減懽味閩粵荆  
湘燕趙而達伊祁故都悲顛連黃河怒洩也曾  
窮源到碣石中條山色總在老夫七尺烏藤前  
今春鄉思頓起俶裝返越國車謙馬瘖難覓脂  
秣殊可憐道過闕里展謁孔廟觀禮器正屆

皇帝重光榱桷新豆邊轆轤街南交公陋巷忽  
與君聚首顏家兄弟簞瓢取樂誠好賢初驚鬢  
髮已變霜雪有衰態坐定轉訴羽毛凋脫泥土  
忘飛翹君言抱經載橐來此聖人之邦償夙志  
願寫淨本一一列入兩廡青瑤鐫我聆斯語獵  
襟增歎息蔡邕往矣三體茫昧靡完全魏邨鄆  
淳蹟就殘毀所留大曆開成諸儒楷法鬻門懸  
又言世尹愛客不遺舊闢櫺加堊爲君分餘田  
軒窓開拓得以正心執筆摹點畫六十五萬二  
百五十二字母頗偏惜我漢落鮮用將乘秋風



放歸溜胡能快覩羣書功畢奏寘魯壁累襪爭  
流傳吁嗟華陽真逸方瞳湛碧自長壽他日隨  
君金堂瑤館攝景尋神仙

題貯清館

策竹到竹裏竹風導我行連繇石多態淺澗魚  
至清忽見九節蒲不共衆草生問之了無荅仙  
貌誰削成

不睡枕上口號二首

攪舍鼾聲久破除不眠夜夜似鰓魚若須閉目  
垂簾坐此是仙人我弗如

居然枯腊稱尪羸者藥空堂試一匙八萬四千  
毛孔裏汗來微有睡來時

病起扶杖循廊小步二首

曾鬪蘭陵八百兒爭先捷步尚嫌遲而今花底  
紅藤杖扶得晴廊立片時

蹣跚平地亦難前跛脚虛教摩涌泉不信去年  
尋虎窟太行容易上青天

問顏大懋倫疾

榻掩青苔徑沒莎巷中深轍幾人過海枯石爛  
愁仍在鳳躁龍狂病轉多齊物彭殤原可擬同

年椿菌又如何憐君秋雨秋風裏擁被寒廳亦  
抱疴

秋雨

秋雨如塵多積病抱幽耿晝分木客吟夜同鴈  
奴警池面風溘溘簷端樹回回何以曲肱牀偃  
卧弔孤影

短睡十韻

睡鄉蚩蚩人樂哉此中訝我久弗來得毋以夜  
爲日在酒國蠟煙如薰花成埃騰觚飛爵忘漏  
促沉湎何啻是鴆媒嬌絲脆竹志易惑溺之官

徵皆生災不然天桃百媚楚女顛翠蛾一一畫  
麝煤長袖善舞更擅曲行雲行雨迷陽臺我聞  
若輩苛責語口勿能辯酸心摧吁嗟作客抱寂  
寞三旬負病形池隕豈但寡歡屏聲色即今斷  
飲焚尊壘斯須拱揖遽別去依舊獨眠魚目開

懷戚五丈東發江上

黑齒曾遊古陋邦歸來散髮卧清江纂書可載  
車兼兩負郭難謀田十雙堂下野花迷舊席門  
前枯柳繫輕艘遙知待我餘杭酒醉弄霜天鐵  
笛腔

西林秋夜聽支十丈彈琴

秋夜白頭客抱琴彈此聲離堂花漠漠古樹水  
丁丁絃直寸心合曲微六氣清斷雲與孤鴈都  
是欲歸情

題何山人琦活埋庵十韻

客舍如團焦林木紛幽覃急喉何居士投老樂  
湛湛一日百憂生戚戚獨繭蠶而非酒可解具  
鍾心失貪抱頭嬾卧起署名活埋庵我覩慄弗  
懾問荅皆悲談讀書不得力辛苦慚丁男滋味  
槩與茶安能變成甘勸子且遊世單步行荷擔

出門山滿目好山在終南

新絃曲

故琴今夕張新絃彈者生澁聲可憐一絃斷兮  
一絃續心有別離手則然枯桐本非繫下棄收  
之古囊且自悶宮徵何嘗音不諧試向歲寒尋  
此意

貧交送別曲答諸酒人并呈蔣三丈

貴交之別祖帳長纓驂紺幃大道傍腊夫炙豕  
還割羊昔聞相送吏部郎貧交之別則不爾濁  
醪一杯話千里落落酒徒尚如此白頭故人可

知矣

秋柳和陳三撰二首

蓬鬆綠鬢負減腰圍可奈風欹霜倒飛已失三眠  
舊時態絕如房老泣孤幃

何愁婀娜一枝殘金縷衣銷舞袖寒轉眼明年  
春二月龍池曉雨拂闌干

近事

曦光烘紙坐堂廉書字無緣換束縑可笑客塵  
生鏡襖花前嬾去摘風髯

六言寄題洪三上舍公寔江湖載酒遊卷

閉關貪飲十榼束帶笑迎五經何似江湖一舸  
綠波顏色滿瓶此中可夢南浦而外宜遊洞庭  
小泊互爲主客野鷗飛下涼汀

馬曰瑄曰璐兄弟招同王岐余元甲汪墳厲

鷓閱華汪沅陳臯集小玲瓏山館

少游兄弟性相仍石屋宜招世外朋萬翠竹深  
非俗籟一圭山遠見孤棧酒闌遽作將歸鴈月  
好爭如無盡燈尚與梅花有良約香黏瑤席嚼  
春冰

宣城沈丈廷瑞畫松歌



我家萬松嶺下松已無煙煤掃跡天水愁糝糊  
却于宣城老子畫中見綠髯紺髮拱揖如丈夫  
昔聞張璪負外最奇古手握雙管齊運與衆殊  
紙上一爲生枝一枯枿落落之狀未肯容臆  
今君遠追遺法自森別硬筆有同割飛鬼國鐵  
何假鳧氏大火來燬成直榦彊立焉能遭錯折  
要我作詩贈我長幅好攜歸挂壁終日坐歎絕  
疣琴悶雨髣髴是爾聲此聲荒涼可聽不可說

過唐太守紹祖吳興郡舍信宿三日瀕別

漫投十韻

春風碧瀾堂扁舟晚來泊汀草雜汀花野香各  
無著靸履入郡齋相見話歲籥輾然笑口開情  
好宛如昨即知廉守賢民事自疏滄信宿三日  
留殷勤一杯酌朋輩得蕭李文翰乃紛作夜聞  
雨淋浪其心在寥廓明將泛江湖馴鷺先我諾  
去去綠蓑衣漁竿計非錯

廣陵北郭花下獨酌

獨攜小榼少人同林木參覃地百弓我與飛花  
都解飲好風相送酒杯中

寄閔八

貧而好客鄭卿賢小別相思若閨年  
簡雨疎風草堂閉定知一夕長苔錢

吳丈弘謨攜酒過寓園竹間對酌長句奉

酬

三春虛擲花事拋今甫重幕燕定巢既無熱人  
共爭席却鮮弟子私相嘲結朋惟愛老蒼好晚  
乃與君深締交越日載酒過別圃竹下一壺傾  
松膠此間種竹可五畝勿遭惡棘纏荒茹繁陰  
當年生冷翠弗揉自直異曲匏滿林得風作笑  
語綠膚新粉抽煙梢夙聞妙手擅鉤勒蕭協律

派非誇嘍欲乞放筆寫萬个目接厓谷心垌郊  
君言秋涼再連話爲我潑墨畫出金錯刀

五月二日吳孝廉瀚上舍濂招飲遍嘗所

藏名醞聽吳下李周二生擷笛度曲醉

成此詩

綠蒲節近晚酒香先開酒庫招客忙酒名記注  
細可數觥船激灩同品嘗中有泥光春更好新  
鷺出浴燭膩黃飲如建瓴不放手三萬六千少  
年場君家弟兄工譜曲減字偷聲皆樂錄傳抄  
今已遍江南肯使酒徒冷空局周郎小李產吳

趨鷓鴣灘頭一雙玉忽來筵上勸我醉激管清  
喉夜忘促調變伊涼入破多後庭還唱定風波  
眼花迷纈心苗損恍聽狗兒吹笛膽娘歌

題汪六處士慎蘭竹二首

雨過深林筆研涼女蘭開處却無郎柔荑駢穗  
多纖態不數金陵馬四娘

道人絕粒面蒼顰寫竹偏來南垞西清瘦兩竿  
如削玉首陽山下見夷齊

寄題李徵君秉元青樞別業

割地棲巖道味深一舜州辟見初心小經曾習

嚴彭祖至孝無慚何展禽雲卷有時來枕席麝  
遊自古在山林餘糧我辦支筇去十八盤中曲  
磴尋

褚先生恒謙老毀儒服委跡浮屠聞其瓶  
拂隱于鄆縣山中寄贈

渴來安得萬年冰却羨清涼住九層晚謝朱轡  
烏府客老爲白閣紫衣僧長眉掃塲花間久左  
手鈔書鐙下能歷盡劫灰人隔世颺輪輾破法  
輪升

憶家

爛銀月色露檐垂千里思家鴈信遲正是擣衣  
衣半濕夜燒熨斗坐空帷

將遊楚中於眞州江上登舟二首

眞州判袂客途新悄悄迢迢最黯神上得孤舟  
聞疊鼓橫波送酒却無人

亂柳摧心野郭秋隔江山翠晚奩收月初缺處  
津頭別髮髯湘煙楚竹愁

寄岳州黃處士端齡

一繩天外鴈來初露脚涼飛月魄虛沆芷澧蘭  
騷客遠朱橋粉郭酒人疎須憐夜杓難同飲莫

悵風帆少定居愛爾洞庭吹笛賦昔年傾倒老  
尚書

過小孤山

古縣蕭條對岸開大江行色榜人催水風多處  
輕擡眼浮出青山似覆杯

郢中放舟至襄陽

船頭望青山衆態逞嬌嬾飢煙明浦樹飽風送  
帆席繼作郢中吟緬懷峴首客際晚計郵程百  
五宿江驛

寒夜過荆山人山居



雪中寒色到肩隅黃葉堆門月暈無想見苦吟  
風燭下靈龜屏息玉蟾枯

西池精舍梅花二首

半影疎枝夢不忘獨來樹下設禪牀酒鐙歌板  
都無用莫亂梅花好道場

月光明似佛堂鐙池水生寒又結冰消受清香  
透毛骨除非前世此山僧

復至武昌將還錢塘留別許士諤二首

一掌好風吹煖煙乞來不費沈郎錢連朝絕似  
嘉陵路水送山迎天上船

官道垂楊客轂系留堆棉搓絮武昌樓此番傷別  
無須酒坐有仙人許散愁

秋夜鮑明府鈇攜酒就劉郎泊小酌與姚

世鍾同過

秋夜秋池幽且娟涼鷗涼鷺五湖天水明于月  
宜同夢樹老如人又十年散髮賀循言可聽啣  
杯謝瀟跡堪憐劉郎泊記思前度好續吳興掌  
故傳

玉湖阻風唐太守招飲浴月歸宿舟中作

此遣興

石尤風甚厲故人酒頗佳阻風兼中酒百憂釋  
客懷先生了公事文案無繁哇簞竹閉鈴閣乳  
雀馴苔階組圭澹相忘林壑期不乖既怨向村  
狂且作錙伶埋歸來見涼月其光新磨揩空船  
啣尾卧濁浪如長淮

歲暮復寓吳興姚大世鈺蓮花莊之寒鑑樓雜書五首

家家三尺好溪光此處溪光墨瀟香樓上南山  
如女色曉奩開候翠眉長

宿葦枯蘆有鴈聲連宵倚檻詎忘情還須把酒

吹寒笛十二回圓坐月明

題壁蛛絲親拂除諸郎昔共此深居蘭熏玉纈

嗟摧折不見對牀人讀書

謂亡友秉衡  
豐萬兄弟

鷗波亭外水濛濛記得今秋攜釣筒消受白蓮  
花世界風來四面卧當中

雪尚未晴雨復喧六時思與阿誰言纜船絕少  
金欄客漁弟漁兄笑叩門

吳中春雨泊舟入夜寒甚被酒作歌

春雨打篷雲冥冥篷底聽雨泊遠汀十五五  
長短亭好山對面失洞庭野梅縛棘香零丁疎

香激玉飛瓏玲苦寒噤瘁夜不寧水際一鐙如  
孤螢照書冷燄光星星傾三百杯影勸形滋味  
濁清辨渭涇醉來荒唐嗤楚醒伴我卧者空酒  
瓶

自曲阿之潤州渡江作三首

小辛邨圯曲街通孟佐湖荒遠岫空好試斜風  
細雨裏紅闌射鴨竹枝弓

碧草抽心花脫胎舊情棖觸客腸迴去年今日  
離筵上楚女春衫拭酒杯

迎船塔影渡江遲愛誦瓜郎五字詩對面相思

若千里石簾山下落潮時

懷張先輩幼持林居

十年焚軌卧林枏深閉書堂少俗矜收得此心  
如鎮石常時見面有寒冰空囊趙壹清無匹一  
揖奚康嬾未能曾共春風二度醉櫻桃花下曳  
青藤

柳二首

銷魂橋外綠匆匆樹亦銷魂客送空萬縷千絲  
生便好剪刀誰說勝春風

酒邊青幔水邊樓郎馬蹄忙可暫留三月長條

如翠帚掃愁不得反添愁

偏汝無端替別離離多合少費相思獨眠人夢  
模糊甚正是飛花作雪時

廣陵秋日雜作三首寄一二友舊

精廬淨于水雙樹縹綠初石琴託心謠竹扇擅  
草書騶從時罕逢隼旗來已虛惟有秋鐙下麴  
生不我疎

明年當爲僧漸欲匿名姓負新叔教飢苦雨子  
桑病未能希十賚安可膺五聘抗顏誓還山還  
山慰幽篁

何兄與樊弟巖館忘世情  
茶夢澹而媚藥塵香  
且清屢訪花隱翁踵息無一聲  
好比江上鷗戢影戀舊盟

送宣城沈隱君遊楚中

君訪漢陰好機心機事無山寒  
道士泐月古郎官湖活筆添松格  
清謠想鶴癭明春定歸卧崦  
戶足茶租

城南僧舍寄梁高士文翰二首

乾淨逍遙地經年白杜情  
晚雲看千變清磬槌  
一聲杞菊澹相向龜魚時放生  
此中悟蕭寂禪



悅最聰明

高卧午纔起浮華已嬾攀秋林廣陵郭鄉夢富  
春山帖帖風襟短栖栖蓬首閑故人書遠寄好  
附酒船還

新編拙詩四卷手自鈔錄付女兒收藏雜  
題五首

聖代空嗟骨相癯常裁別體關榛蕪他年詩話  
添公案不在張為主客圖

鐘聲斷處攢眉想日影趁時擁鼻吟隻字也須  
辛苦得恒河沙裏覓鉤金

古調泠泠造眇微  
玉池清水自生肥  
流傳若待官三品  
誰重襄陽是布衣

天涯詩老浪相稱  
棖觸清愁歲月增  
一櫂今成五湖長  
酒波如練雨如澗

卷帙編完頂髮疎  
中郎有女好收儲  
帽箱剥落經籬敝  
莫損嚴家餓隸書

冬心先生集卷第四

雜正癸丑十四開  
雜于廣陵嚴詩廟

吳郡鄧弘文仿宋本字畫錄寫